

Tài-oân-jī

台灣語



雙月刊 NO.
2025.01

Hòk-khan-hō

13

復刊號 Tài-oân-jī



Sî-kan (1) A-sî
Tân Lûi

Pû-á khó-koe lám leh háu
Lahjih

換料理台記事
O-bah

活動報導 Bûn Têng

- 成大出版明鄉新冊，探討鄭成功部下án-chóáⁿ釘根越南
- 成大kap越南大學做伙推動台語kap越南語教學

Tíng-lâi Ka-gī
Tân Èng-an

Lán lâng ê 做 sit 話 (2)
陳明仁

烏克蘭 kap Lō-se-a teh phah ê 戰爭
Lâu Ui-liông



3/14 拜5
314台灣詩人節 &
台越文學交流



March 14 台灣詩人節，是 ūi-tiōh beh 感念
王育霖詩人檢察官 ê 文學才華 kap 正義行為。

14 Taiwanese Poetry Day & Taiwan-Vietnam Literary Festival

今年除了辦理王育霖詩人檢察官台語詩徵文比賽，
鼓勵少年人投入台灣民族母語「台語文」創作，
也有越南作家特別來台灣做文學交流，
2025年3月14自台南成功大學，
邀請大家做伙來參加！



詳細活動
請參閱網站

主辦單位 /



TRUNG TÂM NGHIÊN CỨU VIỆT NAM
國立成功大學 越南研究中心
NCKU Center for Vietnamese Studies



社團法人台越文化協會
Hiệp Hội Văn Hóa Việt Đài
Association for Taiwanese and Vietnamese Cultural Exchange



台文筆會
Tai-bùn Pit-hoe
Taiwanese Pen



Tâi-oân Lô-má-jí Hiáp-hōe
Taiwanese Romanization Association
台灣羅馬字協會



Tâi-oân Gi-bùn Chhek-giām Tióng-sim
國立成功大學 台灣語文測驗中心
NCKU Center for Taiwanese Languages Testing



TAEF
Taiwan-Asia Exchange Foundation



Tâi-gí Ki-kim-hōe
蔣發太孫玉枝台語文教育基金會
Taiwanese Foundation



vanvn.vn
CƠ QUAN NGÔN LUẬN CỦA HỘI NHÀ VĂN VIỆT NAM

Tâi-gí-si • Sî-kan (1) A-sî	Tân Lûi	2
• Tíng-lâi Ka-gî	Tân Èng-an	3
Sia Lán ê Kò-sū • Lûn hék-chhiń (1)	Keng-lâm Su-tîn	4
• Khan-kâu-á	Khun--ko	6
• 90 nî-tâi ê Tâi-gí lâm-koa-chhiú	Kó-to A-Bêng	8
• Him-siān ê gán-sîn	Ng Giòk-san	11
• Tòa-în iú kám	Sím Èng-thêng	13
Lahjih Gû-giân • Pû-á khó-koe lám leh hau	Lahjih	16

HL

Hàn Lô bûn 漢羅文

A-jîn 專欄—台語 ê 故事 • Lán lâng ê 做sit話 (2)	陳明仁	17
學生朋友來寫作 • 我 ê 阿母	石恩綺	19
寫Lán ê 故事 • 換料理台記事	O-bah	20
• 烏克蘭kap Lô-se-a teh phah ê 戰爭是認同 ê 戰爭	Lâu Ui-liöng	22
• 炕塗窯	朱俊豪	24
台語小說 • 阿郎 (7)	做工代理人	26
活動報導 • 成大出版明鄉新冊，探討鄭成功部下án-chóan釘根越南	Bûn Têng	28
• 成大kap越南大學做伙推動台語kap越南語教學	Bûn Têng	31



Hong-bîn Kò-sû

成大越南研究中心最近出版三本kap越南明鄉人koh有華人相關ê新冊。這三本冊結合越南、韓國kap台灣三國學者 ê siöng新研究，超越傳統研究觀點，ùi東亞kap東南亞宏觀ê視野，探討大明國ê遺臣kap軍民遷sóa到越南、韓國(朝鮮)kap台灣以後，在kap在地人文化接觸liáu，ng在地化、釘根生滌方向發差異ê所在。這三本新冊分別是《唐山過越南：越南明鄉人的認同轉變與在地化研究》、《明鄉人在地化研究：越南、韓國與台灣之比較》kap《越南胡志明市「福鄉人」的族語使用與活力之研究》。



買冊連結

<https://www.atsiu.com/product.html>

總編輯 Chiu^n Úi-bûn

編輯委員 · Chiu Têng-pang · Hô Sin-hân · Koa Khá-lê
· Koch Jün-têng · Masao Tân · Tân Bêng-jin
· Tân Kim-hoa · Tê^n Si-chong · Teng Hông-tin
· Tiu^n Hák-khiam · Tiu^n, Hòk Chû

執行編輯 Tê^n Ti-têng

美術編輯 Hôa-jîn Sî-kak Siat-ké

文字校對 · Chhòa It-bîn · Î Giók-ngo · Tiu^n, Hòk Chû

發行單位

獎助單位



Tâi-oân Lô-má-jî Hiáp-hôe
Taiwanese Romanization Association



台文筆會
Tâi-bûn Pit-hôe
Taiwanese Pen



Tâi-gí Ki-kim-hôe
蔣發太孫玉枝台語文教育基金會
Taiwanese Foundation

<https://tlh.org.tw> | <https://pen.de-han.org>

<https://hoatki.de-han.org>

詳細報導

<https://www.peopo.org/news/705354>



<https://pen.de-han.org/taioanji>

Open access 網路電子版 &
文章投稿請掃QR code

Nâ有任何問題

歡迎來 phoe: taioanjitauko@gmail.com
Tel: 06-2089803



郵政劃撥捐款

帳號 / 31645936

戶名 / 社團法人台灣羅馬字協會

Nâ beh 收tiôh紙本台灣字雜誌，歡迎
自由樂捐。捐款請註明「捐台灣字雜誌」

Sî-kan (1) A-sî

Tân Lûi

A-sî, A-sî,
 Sî-kan sī siáⁿ-mîh?
 Góa sī bô-hêng ê hong,
 E hûn phû--kòe.
 Góa sī khin-siaⁿ ê chúi,
 Kiò lí cheng-sîn.
 Ài-chêng thiah phòa,
 Bē-hù pi-siong;
 Lō-chúi phák-jit,
 Sùn-kan hoaⁿ-hí.
 Kòe-khì, ùi hia góa lâi,
 Í-keng bē-kì.
 Bī-lâi, iáu-bōe kàu-ūi,
 Chheⁿ-hûn bû-ti.
 Kòe-khì gū bī-lâi,
 Seⁿ góa chhut-sì.

Góa sī bô-hêng ê hong,
 Khin-siaⁿ ê chúi,
 E hûn phû--kòe,
 Kiò lí cheng-sîn.
 Sak lí hiòng-chêng,
 Jiok kòe kòe-khì.
 Giú lí tò-thè,
 Kha tâh hiān-sî.
 Góa sī A-sî,
 Sî-kan ê sî.
 Góa sī hiān-sít.



2025 春天
台文博覽會



3/7~6/6
台語羅馬字讀寫

基礎班

報名



3/7~6/13
陳雷台語文學選

前導式讀冊班

報名



全民台語認證

加強班

簡章kap報名表單tī
3月公開放送

線頂 Google Meet 上課

配合2025成大全民台語認證考試時間



Tíng-lái Ka-gī

Tân Ēng-an

Tíng-lái Ka-gī chē hóe-chchia
 lân-lō kong-kéng khòaⁿ kàu-giāh
 Ka-gī chhia-thâu lâi lòh chhia
 Lék-sú kór-chek tiōh tī chia

Sì-hong iû-kheh lâi Ka-gī
 Sim-chêng chheng-sóng chhiò-bi-bi
 Ū siáⁿ-lâng ê lâi liû-ì
 It-kiú-sù-chhit ê kí-tî

It-kiú-sù-chhit 3 goéh thiⁿ
 Tô-sat thâu-lâng ná cheng-sin
 Sí-thé chhìn-chhái tàn lō-piⁿ
 Tiong-kok peng-á cheng-sín-piⁿ

M-chai ê lâng lâi chhit-thô
 Chheng-thian pêh-jit mā o-ló
 Tiong-hôa Bîn-kok iā chin hó
 Pàng-sak lék-sú bô nái-hô

M-sí kiò lí mài koan-kong
 Chhit-thô iû-lám hó hong-kong
 Sì-kè sêh-séh sim-chêng thiòng
 Jîn-sèng su-kiû bián ke kóng

Lék-sú chin-siòng hoeh-sai-sai
 Chèng-hú kám ū hō lán chai
 Mài-koh kiaⁿ-hiâⁿ lâi liáu-kái
 Giäh-thâu bîn-tùi sim châi-châi



資料檔案

台語文有聲導覽資料

二二八 1947 · 0306

歡迎利用 · mā 歡迎指教

.....線頂有聲導覽



TÁ-KÁU

名稱：1947 · 0306 台語文有聲導覽
 內容：Ngô Ka-bêng、台文雞絲麵
 出版：打狗台語文促進協會、台文博覽會

Lūn hèk-chhiⁿ (1)

Keng-lâm Su-īⁿ

Kór-chá sî-tâi Hé-lah lâng khòaⁿ thiⁿ-téng ê chhiⁿ, ū-ê bē tín-tâng. Ták mê to tî sio-siāng ê sór-châi, ùi tang-pêng chhut--lái, tûi sai-pêng lôh hái. Chóng--sî ū-ê ê châu-sóa, chia--ê hō chò πλανήται, ì-sù sî bô hē-lôh--ê, ê châu--ê. Lán chit-má hō chò hèk-chhiⁿ. Hé-lah sî-tâi só kóng ê hèk-chhiⁿ ū chhit liáp: Jit-thâu, Goéh-niû, Chúi-chhiⁿ, Kim-chhiⁿ, Hóe-chhiⁿ, Bók-chhiⁿ, kap Thó-chhiⁿ. Chū-jiān hèk-chhiⁿ tî Hé-lah ōe sî hō in sîn-bêng ê miâ, m̄ sî chiàu lán Tân-gí án-ne teh hō miâ. Jit-thâu kap Goéh-niû, in lóng sìng chò hèk-chhiⁿ, tō sî kan-taⁿ chhú i ê sóa ūi, bô khì khe-khó in büt-lí-tek ê pún-chit.

Kàu Au-chiu bûn-gē hók-heng, Khór Pah-nî thê-gî kóng, Jít-thâu sî ú-tiû ê tionsim, Tê-kiû sèh Jít-thâu teh kiâⁿ. Gê Lí-lé hoat-hiân Bók-chhiⁿ ū ōe-chhiⁿ, khó-kiàn Goéh-niû mā sî Tê-kiû ê ōe-chhiⁿ. Án-ne lâi, hèk-chhiⁿ chhun lâk liáp: Chúi-chhiⁿ, Kim-chhiⁿ, Tê-kiû, Hóe-chhiⁿ, Bók-chhiⁿ, kap Thó-chhiⁿ. Tê-kiû liâh-gôa, chia-ê chhiⁿ lóng hō Lô-má

sîn-bêng ê miâ. Chúi-chhiⁿ teh châu chin kín, chhiūⁿ thian-têng ê iû-piân-sû, hō chò Mercury. Kim-chhiⁿ siōng-kài kng, tê-it súi, hō súi ê sîn ê miâ, Venus. Hóe-chhiⁿ âng-âng chhiūⁿ hoeh ê sek, hō chiàn-cheng ê sîn ê miâ, Mars. Bók-chhiⁿ tê-it tōa liáp, hō thian-têng thâu-lâng ê miâ, Jupiter. Thó-chhiⁿ hō Thó-tî-kong ê miâ, Saturn.

Sòa--lôh-lái 300 tang chit-ê liát-toaⁿ lóng bô koh kái. Thiⁿ-téng ū khòaⁿ-tiôh pát-liáp chhiⁿ mā ê tín-tâng. Chóng--sî hit khoán chhiⁿ ê tha chit tiâu tâng bóe-liu, hâm hèk-chhiⁿ pún-chit koh-iüⁿ, hō chò sàu-chiú-chhiⁿ.

Kàu 1781 nî 3 goéh 13 hit mê, Hô Ulliâm (William Herschel) khòaⁿ-tiôh chit liáp ê tín-tâng ê chhiⁿ. I liâm-piⁿ pò lâng chai, kóng chhôe-tiôh sin ê sàu-chiú-chhiⁿ. Sî-kóng tán i choik kú soah iâ m̄ hoat bóe-liu. Sim lâi giâu-gî, kín chio sòr-hák-ka lâi sìng i ê khúi-tô. Bê oâh lah, m̄ sî sàu-chiú-chhiⁿ, khui-thiⁿ-tê thâu-pái ū lâng hoat-hiân sin ê hèk-chhiⁿ, sûi iōng in kok ông ê miâ, hō chò Jiò-jì. Pát-

kok ê kho-hák-ka chin put-bák, hék-chhiⁿ lóng sī hō sîn-bêng ê miâ, in ê ông thài ū hit-ê chu-keh? Kóaⁿ-kín chham-siông beh kái-miâ. Chióng-kî-bóe koat-têng hō chò Uranus, tō sī Thiⁿ-kong-peh, lán thang kiò i Thiⁿ-kong-chhiⁿ. Án-ne lâi hék-chhiⁿ ū chhit liáp.

Koh lâi, iōng tiàu-kiàⁿ khòaⁿ Thiⁿ-kong-chhiⁿ khòaⁿ sò-cháp tang, soah hoat-hiān i khúi-tō teh kiâⁿ bô háh Niû Tñg tāng-lát pîⁿ-sek sór sñg. Ú lâng kóng, kiám-chhái Niû Tñg ê pîⁿ-sek kan-taⁿ tī Tē-kiû hū-kîn chiah ū èng-hâu. Ú lâng kóng, kiám-chhái gôa-kháu koh ū lêng-gôa ê hék-chhiⁿ teh ka khiú, m̄-chiah khúi-tō cháu-chhoáh--khì. Chai hék-chhiⁿ ê ūi, beh sñg i ê khúi-tō tō kán-tan. Chai hék-chhiⁿ ê khúi-tō, beh sñg lêng-gôa hit liáp khiú--i ê hék-chhiⁿ tī tó-ūi, tō kék tiōng-lân. Hoat-kok ê sò-hák-ka Bé Ú-péⁿ (Urbain Le Verrier) chhōe-tiöh phiat-pōr lâi sñg. I kià phoe hō Béh-lín Tian-bûn-tâi, kóng, “Tī Soaⁿ-iû-chō tē 4 chhiⁿ tang-pêng 5 tō hit ūi!” Phoe kià kàu-ūi hit mê, Gák lok-hān

(Johann Gottfried Galle) tiàu-kiàⁿ siòng hit ūi chit-ē khòaⁿ, tui-tùi tō tī hia. Chiàⁿ-chiàⁿ sī kho-hák kap sò-hák ê tōa sêng-chiū. M-nā Niû Tñg ê pîⁿ-sek ū èng-hâu, mā chèng-bêng sò-hák sī jîn-lüi tē-it hó sai ê ke-si. Chit liáp hék-chhiⁿ hō miâ Neptune, lán thang kiò i Má-chó-chhiⁿ.

Kàu chia lâi hék-chhiⁿ ū poeh liáp. Sū-sít Gê Lí-lé tī 1613 nî tō bat khòaⁿ-tiöh Má-chó-chhiⁿ. Ú kì-liök lâu leh, m̄-koh bô siūⁿ-tiöh kóng he sī chit liáp hék-chhiⁿ. Hit tong-sî iáu bô Niû Tñg ê pîⁿ-sek thang sñg khúi-tō. Chiàu Gê Lí-lé teh siūⁿ, hék-chhiⁿ tiāⁿ-tiöh lâk liáp niâ, siⁿ bák-chiu m̄ bat khòaⁿ lâng chhōe-tiöh hék-chhiⁿ. Án-ne lâi khòaⁿ, Hô Úi-liâm chhōe-tiöh Thiⁿ-kong-chhiⁿ, m̄ sī chhiⁿ-mî niau pōng-tiöh sí niáu-chhí hiah-nih kán-tan, thang sñg chò jîn-lüi chip-thé kho-hák chìn-pōr ê kiat-kó.

Āu-hôe kè-siök



Khan-kâu-á

Khun--ko

Tī kòe-khì ê siā-hōe, nā-sī thiaⁿ-tiōh chit-ê chheng-hōe, lóng hō lâng kám-kak chin gāi-giōh. Ē liân-sióng oai-khì--neh! Kî-sit “khan” sī ū nñg-chióng ê kóng hoat--lah! Chit chióng sī chiam-tùi lâng, koh chit-chióng sī tùi bé-bē ê mih-kiāⁿ, ték-piat sī kóng tī chhù-thèh bé-bē ê kau-ék. Kòe-khì Tâi-oân ùi lóng-giáp siā-hōe kàu kang-giáp kàu hiān-tāi ê kho-ki sè-kài, koh kóng chit-ê sū chin-chiàⁿ bô bûn-ngá--neh!

Chóaⁿ-iūⁿ kóng--leh? Nā-sī í lâng lâi kóng, kòe-khì ū mûi-lâng lâi kóng lâm-lú ê hun-in koan-hē chhiok-sêng sī chin-hó, tān-sī nā-sī iōng bé-bē ū kim-chîⁿ ê kau-ék tōh ê hông kóng sī “sam-chhit-á¹”, chiâⁿ pháiⁿ-thiaⁿ. He-sī bô kám-chêng ê bé-bē, hō lâng khah bē chiap-siū. Sór-pái nā-sī hō lâng kóng “Lí leh chò khan-kâu-á--oh?” Kám-kak chiok m̄ sī chu-bī-ê! In-ūi hiān chû-sī góa tō-sī leh chò chit-hâng khang-khòe--lah. “Khan-kâu-á” chhiáⁿ m̄-thang koh-

chài kóng--ah. “Tiong-lâng” iáh-sī “Tiōng-kài” (sī Hôa-gí tit-ék), chiah-sī bûn-bêng ê kóng-hoat. Mā-ū chèng-hú ê kui-tēng m̄ sī chhìn-chhái ē-sái lâi-chò--ê-neh! Lóng ài keng-kòe jīn-chèng chiah ē-sái lâi chò bé-bē “Tiong-lâng” ê siāu-kài--neh! Nā-bô mā ē hoát kah kiò m̄-káⁿ--oh.

Chhù-thèh bé-bē khak-sít bô hiah kán-tan, iû-kî sī thó-tē ùi saⁿ-gō pah-bân kàu sì-gō chheng-bân, khah tōa-tiâu chiūⁿ ek--ê lóng ài siong-tong ê jīn-chin kut-lát, chiah ū ki-hōe thang lâi sêng-kau! Chhìn-chhái “Hó-lân-chhùi” kóng-kóng--leh tiōh-beh sêng-sû--oh! Chiáh khah bái--leh, tiān-tiōh ài ū choan-giáp ê lí-lō. Lâng kóng “Bé ti bé káu, chû-lâng khai-kháu”. Nā chit-ê lâng-kheh beh khui-chhùi kā lí chhut-kè, ū-ê sī leh thàm kè-siàu thàm lō! Chû-iàu sī beh chai-iáⁿ té-kè, beh án-chóaⁿ ín-tō hō i lâi thiⁿ kàu ū sêng-kau ki-hōe--neh! Che-sī chit-mñg chin kang-hu. Bé-hong

¹ Sam-chhit-á: bé-bē í 30% iáh-sī 70% lâi pun lí-sûn.

chhut-kè āu, iū-koh ài lâi chhú-lí bē-hong bē-kè ê sò-jī, tiān-tiōh “ū gōng bé, bô gōng bē”. Ték-khak sī bē-hong ê kian-chhî, tiān-tiōh ài-koh chit-pái ê chhia-lûn-chiàn chiah ū hoat-tō lâi sêng-kau.

Che kî-tiong ê ò-biāu chi-chhù koh m̄-sī saⁿ-n̄ng kù ōe ē-tàng kóng-kàu tah--ê! Chit-ê àn-kiāⁿ pēng m̄-sī hiah-nī khin-khó, tō ē-tàng lâi kau-ék sêng-kong. Bô saⁿ-n̄ng-pō-chhit--á, beh án-chóáⁿ ē-tàng sūn-lī sêng sū--leh?

全白話字

1套4本

Lahjih 台語寓言集

HÓ-SIAU-SIT
HÒNG-SÀNG

請有志tàu-tīn lâi關心!
Chò-hóe lâi sio-thīn!

Tâi-oân-jî POJ Péh-ōe-jî

2025 經典文學作品
出版募資計畫

詳細預購資訊 2/28 ē公布tī台灣羅馬字協會網站

90 nî-tāi ê Tân-gí lâm-koah-chhiú

Kó-to A-Bêng

Koa-khek sī bûn-hòa ê iân-sin kap thoân-sêng, mā-sī chít-ê chók-kûn bó-gí hoat-tián bē-sái khiàm-khoech ê goân-sò. Tùi chit-ê 1970 nî-tāi chhut-sì ê Tân-oân gín-á lâi-kóng, siōng-chá chiap-chhiok ê im-gák, tû-liáu gín-á koa, tō-sī Tân-gí-koah-ah. Góa kám-kak góa ūn-khì chiâⁿ-hó, sêng-tióng tī Tân-gí-koah ê ñg-kim sî-tāi. Kin-á-jít tiôh beh lâi hun-hióng góa kám-kak 90 nî-tāi sì-ê tiōng-iàu ê Tân-gí lâm-koah-chhiú.

1987 nî, Kok-bîn-tóng chèng-hú soan-pò kái-giâm, chìn-chêng pī-kìm ê Tân-gí-koah mā khai-sí hôe-hók éng-jít ê kong-chhái. 1988 nî, lâp Khé-tiân ê “Ài piàⁿ chiah-ē iâⁿ” tiôh-sī hit-sī-chûn Tân-oân-lâng ê kok-koah. Phoe-háp hit-ê sî-tāi, Tân-oân ê keng-chè khí-poe, kui-kang lóng ê-tàng thiaⁿ-tiôh chit-tiâu koah. 1990 nî cháp-jī--goéh, chit-ê Chiong-hòa lâi ê chng-kha gín-á, Lím Kiông, hoat-hêng “Hiòng-chiân kiâⁿ” choan-chip. Che káⁿ-ná sī hiòng Tân-gí koah-tôaⁿ tàn chit-liâp chà-tôaⁿ kāng-khoán. Kòe-khì ê

Tân-gí-koah lóng-sī khah pi-chêng ê khek-tiâu kap koah-sû, “Hiòng-chiân kiâⁿ” ê chhut-hiân hō Tân-oân-lâng chai-iáⁿ Tân-gí-koah mā ê-sái sī chiâⁿ-bîn chek-kék--ê. Put-jî-kò góa kám-kak chit-tiuⁿ chhiùⁿ-phìn sī Lím Kiông tùi hit-ê sî-tāi ê Tân-oân siâ-höe koan-chhat ê kám-sióng. Sớ-í tû-liáu “Hiòng-chiân kiâⁿ”, iáu-ū “O-lián peh-á”, “Pêng-hoân ê lâu-peh-sèⁿ”, “Chit-khoán ê tāi-chì” téng-téng ê koah, lóng kā hit-ê sî-tāi ê khì-hun biâu-siá kah chin hó. Lím Kiông tû-liáu lòk kòe saⁿ-tiuⁿ chhiùⁿ-phìn í-góa, mā-ū saⁿ-siú chiâⁿ ū miâ ê toaⁿ-khek, “Siàu-liân--ê an--lah”, “Hêng-hok chìn-hêng-khek”, “Bô-siaⁿ ê só-châi”, lóng-sī khùi-kháu chiok hó ê Tân-gí-koah.

Tī “Hiòng-chiân kiâⁿ” hoat-hêng chha-put-to chit-nî liáu-āu, í phoe-phòaⁿ sî-sû chhut-miâ ê koah-chhiú Lô Tân-iū, chhut-pán i-ê thâu-chit-tiuⁿ Tân-gí choan-chip, “Goân-hiong”. Chit-tiuⁿ choan-chip lâi-té tāi-pôr-hûn ê koah lóng-sī kap Tân-oân ê lèk-sú ū koan-hé. Mā-sī thâu-

chit-tiuⁿ Tân-oân ūi chú-thé ê Tân-gí choan-chip. Kèng-ka ték-piát--ê sī, lāi-té ū chhit-siú koa sī Lí Khun-sēng lāu-su thiam sū--ê. Lí Khun-sēng lāu-su ê kong-lék chiàⁿ-káng bō-ōe kóng. I iōng chiok súi-khùi ê koa-sû kā Tân-oân sì-pah-nî lâi ê lék-sú biâu-siá kah sú lâng chiān kám-tōng. Tī só-ū ê khek-bók lāi-té, góa siōng chhui-chiàn “Goân-hiong I”, “Goân-hiong II” kap “Ták-ke bián tiōh-kiaⁿ”.

1994 nî, Tân-gí koa-tôaⁿ chhut-hiān chit-ūi sîn-kî ê koa-chhiú, Ti Thâu-phôe. Ti Thâu-phôe sī thâu-chit-ê chhiùⁿ Tân-gí RAP ê koa-chhiú. Thâu-chit-tiuⁿ choan-chip, “Lâi pàng-liō”, m̄-nā chhiò-khoe, mā-ū phoe-phòaⁿ sî-sū á-sī keng-thé chèng-hú ê khau-sé koa, chhin-chhiùⁿ “Tiong-hôa Bîn-kok bān-bān-sòe (稅).” Ti Thâu-phôe chóng-kiōng chhut kòe peh-tiuⁿ choan-chip, kî-tiong góa siōng kah-ì tē-saⁿ tiuⁿ, “Goán-tau sī siáu-lâng-īⁿ”. 1996 nî, sī Tân-oân thâu-chit-pái ê chóng-thóng tit-soán, Ti Thâu-phôe kā hit-sî-chün ê soán-kí khì-hun biâu-siá kah oáh-

thiàu-thiàu. Kî-tiong ê kúi tiâu koa thèh lâi chò chit-má ê soán-kí-ko, mā-sī oân-choân lóng bē thè liû-hêng.

Chòe-āu chit-ê beh siāu-kài ê koa-chhiú, tiōh-sī hong-tōng bú-lím, kiaⁿ-tōng bān-kàu ê Tân-oân ê King of Live, Gō-pah. 1992 nî, Gō-pah hit-tong-sî chiah jī-sì hòe niā-niā, i tōh siá chhut “Lâu-á-chhù” kap “Su-liām chhin-chhiùⁿ chit-tiâu hô” chit nñg-siú iu-bí siá-sít ê koa. 1998 nî ê it-goéh té, Gō-pah chóng-sìng sī chhut-pán i-ê thâu-chit-tiuⁿ Tân-gí choan-chip, “Chhiù-ki ko-chiáu”. “Chhiù-ki ko-chiáu” m̄-nā tōa-bē chhiau-kòe 70 bān tiuⁿ, koh tit-tiōh 1999 nî ê Kim-khiok-chióng Chòe-ka Liû-hêng Im-gák lán-chhiùⁿ Chhiùⁿ-phìⁿ. Gō-pah siá ê Tân-gí-ko ê ték-sek sī, i ê koa-sû sī iōng tián-ngá koh súi-khùi ê Tân-gí só siá--ê. Sui-bóng i ê koa tāi-pō-hūn mā lóng-sī liû-hêng-ko, tān-sī i ê chû-tê bē kan-na sī lâm-lú ì-ài ê chêng-ko, niā. Tī chit-tiuⁿ choan-chip lāi-té, chêng-ko, chí-ū “Sim-ài--ê chài-hōe--lah”, “Saⁿh-tiōh lí”, “Poe

tī hong-tiong ê sió-hō” chit kúi tiâu niā. Kî-tha chhin-chhiūn “Chhiū-ki kō-chiáu”, “Phiau-lōng”, “Khong-sip kéng-pò”, “Pâi-hoâi iā tō-chhī” téng-téng, lóng-sī chìn-chêng ê Tâi-gí koa chiok-chio biâu-siá--tiôh ê chû-tê. Chit-tiuⁿ choan-chip ê koa, góa siōng chhui-chiàn--ê sī “Toān-chhiâng-si.” Gō-pah kā chit-siú-koá siá kah ná chhin-chhiūn sī chít-siú

kó-si. Ùi chia tiôh khòaⁿ ê chhut-lâi, Gō-pah sī chit-ê chiân ū bûn-hòa ê koa-chhiú. Tī só-ū 90 nî-tâi ê Tâi-gí choan-chip, góa jîn-ûi “Chhiū-ki kō-chiáu” choát-tùi sī tē-it-miâ.

Koa-khek sī gí-giân ê té-tì. Ng-bâng sòa--lôh-lâi ê-sái ū koh khah chē iu-bí ê Tâi-gí-koa thoân-sè, hō chit-má ê gín-á kám-siū tiôh Tâi-gí ê bí-lê.

全民台語認證
Choân-bìn Tâi-gí Jîn-chèng

檢驗家已ê 愛台指數

每年春秋季舉辦

多一份語言證照
多一份就業及升學加分機會

E-mail: tgpmcia@gmail.com
Tel: 06-2387539 Fax: 06-2755190
相關詳情歡迎請參閱官網資訊
<https://ctlt.twl.ncku.edu.tw/gpt>

Tâi-oân Lô-má-jî Hiáp-hōe
Taiwanese Romanization Association
台灣羅馬字協會

主辦單位
NCKU Center for Taiwanese Languages Testing

Him-siān ê gán-sîn

Ng Giòk-san

Pài-saⁿ hit ē-pơ, góa khì iu-chí-ián chài Sūn-chi. I sī ták-kang lóng hō sī-tōa kóng bē-thiaⁿ ê cha-bó gín-á. In pan lāi-té chit-ê hō-chò Phín-him ê tōng-ōh, in ma-ma í-keng tī-hia tán--ah. Mâng-kháu ê lāu-su sūi khòaⁿ-tiòh góa, tiòh seng pang góa hòng-sàng: “Khór Sūn-chi beh tñg--khì-ah!” “Khór Sūn-chi ‘go home’!” Chit sî Phín-him í-keng chin mé-liáh chông khì sió-pan hia, kiò in sió-tī chò-hóe kiâⁿ--chhut-lâi. Sòa--lòh-lâi, in saⁿ-ê lâng tō chhiú-khan-chhiú khiā tī hák-hāu tōa-mñg ê chiàⁿ-pêng. Chit-sî tō thiaⁿ-tiòh Sūn-chi ê tō-su hoah-kóng: “Khór Sūn-chi lí seng khì piān-só!” “Khór Sūn-chi lí khah kín--leh!” “Khór Sūn-chi lí bô òaⁿ ê-á!” Khór Sūn-chi...” Lāu-su ê thé-un í-keng chhèng-koân--ah.

Keng-kòe cháp kúi hun-cheng liáu-āu, Phín-him in saⁿ-ê lâng koh tī hia, in ma-ma tō iōng chiok un-jiû ê siaⁿ-im mñg i kóng: “妳還要繼續等她嗎?” Phín-him chiok chhut-lát tìm-thâu, piáu-sī beh koh tán. In ma-ma chí-hó ìn kóng: “好吧!

我們再等她一下”. Tōa-pō-hün ê sī-tōa chiap-tiòh gín-á, lóng ê kóaⁿ-kín beh châu. Góa khòaⁿ in tán chiok kú, koh koan-chhat in siòng ê hong-hiòng. Góa mñg in: “Lín leh tán siáng?” In ma-ma kóng: “她說要等Khór Sūn-chi”, “跟她說完再見，才要回家”. (In sī góa-séng ka-têng, bô leh kóng Tân-gí.) Góa kiaⁿ chit-tiô.... “Hăⁿ? Lín leh tán Sūn-chi?”

Àm-sî peh-tiám-góa, kā Sūn-chi sé-thâu ê sî-chûn. Góa hóng-mñg-i: “Sī án-chóaⁿ hit-ê Phín-him hiah ài--lí?” Sūn-chi: “In-üi gún pan kan-na góa kóng Tân-gí, i siúⁿ beh thiaⁿ góa kóng Tân-gí.” Hăⁿ? Che sî siáⁿ-mih ku-koài ê hiän-siōng? Goân-lâi in lāu-su kóng: “Góa leh liâm Sūn-chi ê sî-chûn, kui-pan lóng chiok choan-sim leh thiaⁿ gún leh kóng siáⁿ.” In pan ê tōng-ōh him-siān Sūn-chi ê-sái iōng in bē-hiáu kóng ê gí-giân hâm lāu-su ín-chhùi-ín-chih. Ták-kang lóng ê thiaⁿ-tiòh in pan ê tōng-ōh: “Khór Sūn-chi早安”, “Khór Sūn-chi ‘bye bye.’” Chin kór-chui. Ù chit-kang, kāng-khoán leh tán-thâi gín-á ê sî-

kan, in-pan lēng-gōa chít-ê tōng-oh ê a-má, mñg kóng: “爲什麼她的名字聽起來怪怪的？要怎麼寫？” Góa ìn kóng: “Che sī Tâi-gí-miâ--lah!” Khòaⁿ tiòh i ê chheh-pau téng-koân, siá ê miâ kóng: “喔！是許順之啦！” In sun-á tō chiok kek-tōng ê kā i kóng: “不是！她是Khór Sūn-chi！” Kui ê bīn chiok jīn-chin--ê.

In-ūi chèng-tī ê koan-hē, chit ê sè-tāi ê gín-á tō chù-tiān iōng Höa-gí lâi su-khó, piáu-tát ka-kī. Nî-hòe khah tōa ê ko-tiong-seng tō ê ná hoah “Sūn-chi”, ná-chhiò, tòng chò chhiò-khoe. Tān-sī, che nā-sī chit-ê Eng-gí-miâ, in kám ê kám-kak hó-chhiò? Kám ê khì chhiò chit-ê Eng-gí kóng kah chiok lián-tng ê gín-á? Choát-tùi bē.



1月 蔣爲文・楊允言・林裕凱
故鄉ê聲嗽 ——

陳明仁kap 1990年代ê學生台語文運動

2月 丁鳳珍
陳明仁先生ê台語文實踐kap創作

3月 陳慕真
陳明仁作品紹介

4月 蔣爲文・近藤綾・吉田眞悟・多田惠
陳明仁作品ê外譯kap行銷

5月 Lâu台語瑞士ê台語社
陳雷台語文學讀冊會讀冊伴
陳明仁讀友交流會

6月 陳明仁
陳明仁ê文學作品出版

台文博覽會
2024講座回顧
Youtube全部上線



7月 鄭良光・陳雷・張秀滿・蘇正玄
陳雷kap 1990年代ê海外台語文運動起鼓

8月 陳雷・陳慕真
文學對談 ——
陳雷ê台語文實踐kap創作

9月 Lâu台語瑞士ê台語社
陳雷台語文學讀冊會讀冊伴
陳雷讀友交流會

10月 陳雷・吳鈺瑾
文學對談 ——
陳雷文學ê創作kap思考
11・12月 陳慕真・
成大台語師資班馬雅各班成員
陳雷短篇小說ê文學地景 (一)(二)



台文作家系列講座 TÂI-BŪN
CHOK-KA HĒ-LIĀT KÁNG CHÓ

認 bat 台文作家
陳明仁 & 陳雷先生

Tòa-īn iú kám

Sím Êng-thêng

Siūⁿ-khí pài-gō hit-kang, hīⁿ-á óa bīn-téng ê só-chāi sió-khóa-á chéng-chéng. Góa bō iàu-ì. Kòe chit-kang, lú lâi lú chéng, sīm-chì ê thiàⁿ, tō siūⁿ kóng thoah-á té iáu-koh ū kū-nî hīⁿ-á hoat-iām ê iōh-á, seng théh-lâi chiâh khòaⁿ-māi, khòaⁿ chiâh ê hó--bē. Tán-thāi hō lâng ñg-bāng.

Liāu-sióng bē kàu, hīⁿ-á m̄-nā bō khah hó, tian-tó lú chéng lú tōa. Thâu-khak mā khai-sí thiàⁿ--khí-lâi. Kui-ê lâng siān-siān, siáⁿ-mih tāi-chì lóng chò bē lòh-khì. Chí-hó jīn-miā koai-koai chhéng-kà kòahō hō i-seng khòaⁿ. Hit chit kang, góa chin chá tō kàu-üi, siūⁿ kóng pōh lī-ün khòaⁿ ê-sái tāi-seng hō i-seng chhú-lí-bō. Kiat-kó, chū-thâu kàu bóe lóng-chóng tán saⁿ tiám cheng. Nā m̄-sī chin-chiàⁿ thiàⁿ kah tòng-bē-tiâu, sit-chāi tán kah chin bē-sóng. Tán-thāi, hō lâng bē-kham-tit hoân.

M koh lûn tiôh góa ê sî, i-seng un-jiû koh khoe-hâi ê thâi-tō, hō góa goân-pún ak-chak ê sim-chêng liâm-mi thiòng-thâu--khí-lâi. I-seng

kau-tài kóng théh kāng-khoán ê khòng-seng-sò seng koh chiâh-kuí-kang-ah. Nā iáu-sī chiok thiàⁿ, āu--jit chiah koh lâi mñg-chín, bō tiôh seng khì kip-chín. Hó-ka-châi chit-chióng kiat-kó, kap góa siūⁿ-ê bō-saⁿ-kâng. Pún-té í-keng chò hó sim-lí chún-pī, liâh-chún ê iōng to-á koah-khui hō lâng lâu-chhut-lâi, iâh-sī iōng chiam-tâng kā lâng thiú-chhut-lâi. Sim-lâi hit-liáp tîm-tâng ê chiöh-thâu ê-sái seng khÙng--lòh-lâi--ah.

Keh-tíng-kang góa chin ì-góa chiaptiôh i-seng khâ--lâi ê tiān-ōe, kiàn-gî góa tòa-īn tī-liâu, eng-kai ê khah-kín hó. Nā-bô, hiah-nî giâm-tiōng ê hoat-iām, khó-lêng iōh-á ài chiâh chin kú. Lî-chhiáⁿ hoat-iām tī thâu-náu kha-tau, kiaⁿ băi-khín cháu tûi náu-pō--khì, tóh chin hùi-khì--ah. Thiaⁿ tiôh i-seng û chit-khoán kò-lû, góa mā kín kā hák-hâu chhéng-kà. Tán-thâi pài-sì chò PCR chhái-kiám, hó chún-pī pài-gō tòa-īn.

Tòa-īn liáu-āu, in-üi tú-tiôh pài-lák lé-pài, kan-ta hō-lí-su lâi chÙ khòng-seng-sò niā-niā. Kui-kang

lóng teh tih-tōa-tâng, bô tō put-sî bong khòaⁿ-mái chéng--khì-lâi ê sór-châi kám-ū khah siau--chit-kóa. M̄-koh tāi-chì m̄-sī gōng-lâng só siūⁿ hiah-nī kán-tan. Pài-it i-seng sún-pâng ê sî tiòh tit-chiap an-pâi pài-saⁿ khui-to. Chún-pī koah chit-sûn seng kā lâng chek--chhut-lâi, sún-sòa chheng hó chheng-khì. Án-ne iōh-á hāu-kó ê khah hó. Só-í tō khai-sí kiaⁿ-kiaⁿ koh siūⁿ beh khah-kín hó, siūⁿ beh chhiú-sút, koh bô siūⁿ beh khui-to ê hòk-cháp sim-chêng.

Ùi tòa-īⁿ kàu chhut-īⁿ thâu-bóe lóng-chóng n̄ng lé-pài. Sui-bóng góa lóng ka-kī chit-ê, koaiⁿ tī pēⁿ-pâng lāi-té, bô-lâng hó kóng-oe. Mā put-sî thiaⁿ-tiòh gín-á teh háu, lāu-lâng teh haiⁿ, ka-siōng khang-chhùi chin thiàⁿ, sim-koanⁿ-thâu sit-châi bô kài sóng-sân.

Nā kóng tī góa tòa-īⁿ kî-kan siōng thiám--ê sī siáⁿ lâng, it-tēng tō-sī goán khan-chhiú. I pún-té tō ták-kang Ka-gī Ko-hiông chē ko-thih thong-khîn, goân-pún chái-khí lóng-sî góa sàng gín-á thák-chheh. Hiān-

chú-sî góa tòa-īⁿ, i ták-kang lóng-ài chhéng-kà chit tiám-cheng, sàng gín-á thák-chu liáu-āu, chiah ê-tàng khì siōng-pan. Ú kúi-kang-á mā tō pài-thok tōng-sū tāi-khò, hó thang kóaⁿ tñg-lâi chiap gín-á hā-khò. M-nā án-ne, chhù-lâi ê tōa sè hāng tāi-chì lóng-ài i chhú-lí. Góa tûi i sit-châi chin pháiⁿ-sè, iû-kî sî tng n̄ng ê gín-á teh oan-ke, i tō ài koh khan-kà, koh ài bô-êng ka-lâi-sû. Góa kan-ta ê-sái kā kóng “Lí sin-khór--ah”, kî-thaⁿ lóng bô hoat-tō tàu-saⁿ-kāng.

Hó-ka-châi chit-má bāng-lō tiān-oe chin hong-piān, iáⁿ-sìn beh khòaⁿ tō ū, ták-kang lóng ê-sái kap bó-kiáⁿ kóng tiòh oe, kîⁿ tiòh bīn. Hō-siong hun-hióng seng-oåh, mā kap kó-chui ê hāu-seⁿ cha-bó-kiáⁿ káng--chit-ê. Chū in chhut-sì tō m̄-bat kap góa hun-khui chiah-nī-kú--kòe. Ták-kang tán in hā-khò, iáⁿ-sìn sī góa chit-châm-á siōng kî-thâi ê tāi-chì. Tán-thâi sī chhiong-boán kî-thâi--ê.

Ùi iù-tī-hñg khai-sí, ták-kang khì hák-hāu tō tán hā-khò kap tōng-

óh tàu-tīn chhit-thô. Keng-kòe kok-hāu-á, chho-tiong, ko-tiong mā-sī tán-thāi kap pêng-iú chò-hóe thák-chu hák-sip. Liân chhut-gōa thák tāi-hák kàu chhut-giáp, tán chò-peng, chhōe-thâu-lō, tán ū-iān-lâng lâi chò khan-chhiú, kiat-hun seⁿ-kiáⁿ, sīm-chì tàh-jip tiong-liân, chiām-chiām chē-hòe, khai-sí chit-tui pēⁿ-thiàⁿ, it-tít kàu lî-khui sè-kan, mā lóng sī pit-jiān ê kòe-têng.

Lâng it seng tiong chóng--sī ū tán-thāi ê sī-chūn. Gín-á sī tán tōa-hàn thang-hó ka-kī chò-chú, bō siūⁿ beh hō lâng koán tiâu-tiâu. Hák-seng sī-tāi siōng-khò tán hā-

khò. Khó-chhì liáu-āu tán tap-àn kap sēng-chek. lok-hōe ê sī tán súi cha-bó gín-á, tán koh khah kú mā bē thiám. Iáu koh ū chin-chē chin-chē ê lē. Tán-thāi ū tang-sī-á sī hoaⁿ-hí--é, ū tang-sī-á sī khór-būn--ê, mā-ū tiōh-kip--ê, mā ū chhiong-boán kī-thāi kap hi-bāng--ê.

Sui-bóng tán-thāi ê kiat-kó bō-it-tēng sī hō lâng boán-ì--ê, tō-sng sī án-ne, kok-sek kok-iūnⁿ ê tán-thāi hong-hù lán ê jīn-seng, hō lán ū bō-kâng ê kī-tî, in-ūi tán-thāi hō lán ê kī--tit, in-ūi tán-thāi, hō lán thêng lōh-lâi kiám-sī jīn-seng ê hōng-éng.



講者：Hē-bí
台文雞絲麵發起人

PhahTaigi
台語輸入法 + **ChhoeTaigi**
台語辭典

台文雞絲麵

利便台語文學習好ke-si !

奇月基礎場 /
完全免基礎，來體驗PhahTaigi台語輸入法。

雙月進階場 /
已有台語羅馬字基礎，來學習PhahTaigi台語輸入法、ChhoeTaigi台語辭典等使用技巧kap撇步。




活動細節請關注
「台文博覽會」官方Linktree
<https://linktr.ee/taibunexpo>





Pû-á khó-koe lám leh háu

Bûn / Lahjih Tô / 陳坤明



Chhài-hâng chhài-se móa-móa-sī, m̄-chai án-chóaⁿ pû-á khó-koe lám leh háu: “Ná-ē chiah-nī soe. M̄ kā lán o-ló tōh chún soah, kiàn-pái in nā iu-thâu-kat-bīn bō hoaⁿ-hí, tōh khoe lán tú-siàu. Siáⁿ-mih pû-á-bīn, khó-koe-bīn. Lín leh khó-liân-tāi, hām goán siáⁿ tī-tāi?”

“Tōh-sī meh, in lâng siāng gâu kā lâng keng-thé, siāng gâu kā lâng chhiò soe. Ka-tī soe, soah kóng chèng pû-á seⁿ chhài-koe.”

Tiōh mā kóng, m̄-tiōh mā kōaⁿ leh sōe, o-phīⁿ-kóng o-péh-ōe, lán siāng hó mài chhap--i.

Gū-ì

Bô lí-sèng ê phe-phêng, mài chhap--i.

Lán人ê做sit話 (2)

陳明仁

Koh講田地ê問題，田是tâm作，土地ài先整地，整讀白話音chiáⁿ，整理，文讀音chéng，用tī虛動詞，chéng hì-láng、chéng kiáu、chéng公司、chiáⁿ頭chang、chiáⁿ皮鞋(修理鞋仔)、chiáⁿ地。先用犁，了後用loáh-tâng拖平，loáh-tâng是大kho柴，長長，釘鐵勾，縛索仔hō牛拖講拖loáh-tâng界hō平，phah lākták，hō塗丸仔碎--去，kan-taⁿ chiáⁿ地就真kāu工，ka-chài m̄是ták年lóng tiōh-ài chiáⁿ地。Koh來ùi田頭溝仔beh引水入田，稱水田，專業語是phòanⁿ水，m̄是淹水，淹水是自然水淹--入-來，phòanⁿ是專工khioh水路引入水，tú好tīⁿ就好。圳溝通常khah kē，岸khah koân，這時tiōh ài踏水車kā水ùi kē引koàn入細條溝仔，溝邊kút khiah，引水入田頭仔，田頭koh tiōh設lô-chuí-ko khut-á，水--nih有雜塗先沉--落-來，清水chiah thang khioh水路入田--nih，稻秧仔chiah bē敗櫟! Koh tñg來講稻仔án-chóaⁿ 生活! Ták冬收成了lóng ài留kóa chhek種，通稱「米母」，chhek種khē tī塗--nih，用稻草khàm--起-來，ài hiù水，無幾工就puh-íⁿ，像hip豆菜án-ni，m̄-koh豆菜是用綠豆來hip，會puh-íⁿ，

有豆菜。稻íⁿ khah長大了後，就是秧仔。秧仔生kui phiàn，用秧thio kui-bô連塗thio--起-來，khèng tiàm ng-lap-á(秧納仔)。Ng-lap-á是竹bîh仔編--ê，beh pò田ài用ng-lap-á té。秧船是柴pang kap-choh--ê，專工beh khèng ng-lap-á落水田，beh pò ê田有phòanⁿ水--á，用柴khok仔載秧仔，tī水面拖，ná像水面行船。Beh播秧仔，是kā chéng頭仔chín入塗--nih，chéng頭仔會受傷，ài套銅chéng甲，林文欽社長講in hia ê銅chéng-kah稱黃kóng仔，真心適!(林文欽，前衛出版社社長，故鄉tī雲林崙背鄉舊庄，kap阮二林原斗竹圍仔庄，隔濁水溪兩岸，離無真遠，in ê作sit話大部分kap阮庄無siáⁿ精差。)，播田插秧仔倒退行，爲beh掠直，ài有柴架仔作界chiah插會直chōa。講--來作sit bē-sái má-hu，1 khu稻仔若歪ko chhih-chhoáh kám會看口--tit!

水ài chiáp巡，bē-sái siuⁿ tīⁿ，有時半暝也ài來巡看田水若phòanⁿ到giáh，ài kā掘ê水khiah塞--起-來! Koh不時tiōh so草，田--nih bōe種choh前，chiáⁿ地也犁田，稻仔割了ê田日頭曝kah ta-khok-khok，犁田就是kā ta

塗犁開，hō本底塗--nih ê有機礦物質翻新，頂季ê有機質hō作物食了--ah!犁過ê田，會烏塗khàm白塗，ó--出-來ê塗有地下水，塗色烏--ê。筆者ê詩〈作sit〉有寫，「日頭kha，掘á掘，烏塗khàm白塗...。」無經過hit款都合--ê，m̄知意境。

秧仔播了，真緊就雜草會puh--出來，ài so草，跪行tī田--nih，kā雜草根khau掉，chin入塗--nih，ài so幾nā piàn，so草工khah輕khó，gín-á人mā tiòh tau choh。到稻仔beh大，ài iā肥料，肥料是去農會領--ê，講是「領」m̄是免錢，貴som-som，等稻仔收成chiah put粟仔去農會tú數，農會是政府teh控制剝削農民--ê，理事長、總幹事lóng國民黨--ê，選舉也是大thiāu仔kha。肥料外銷ê價數是賣農民ê 10分之1，農業地區國民

黨透過農會kap水利會操控農民，選舉也是2會ê重要主管做國民黨ê候選人。水利會收水租，一直到人民出來抗水租運動後，chiah廢止。

Koh tíg來講播田，稻仔大檜會有稗仔(phē-á)介成稻仔形，一般人m̄是真正作sit人，分bē清楚稻仔kap稗仔，稗仔ài khau掉，中文ê稗官稗類養分。到稻穗有米漿到beh結實，稱kiat-kūi，液體漸凝成固體，會開花，稱「弄花」也有講「bāng花」。台灣稻作歷史真久長心適，米有蓬萊，在來，chút米，尖chút圓chút，koh有khah新ê烏米。尖chút仔kap圓chút就是作米糕kap油飯無kāng ê材料。

後回繼續



台南市永康國小學生作品

我ê阿母

5年1班 石恩綺

我ê阿母實在真súi，我ê阿母伊kah別人ê阿母無kāng，因為伊看--起-來足少年。伊ták工lóng足òaⁿ轉--來，伊親像m̄知按呢會jú來jú老，我足想beh kā伊講，m̄-koh伊爲tióh beh趁錢，所以伊bē-tàng無去做khang-khòe，我感覺伊應該ài有適當ê hioh-khùn。我nā beh iú-hàu阿母，我就愛幫阿母照顧小弟負責任，若無伊就會足òaⁿ才睜。阮全家我上蓋kah意ê人就是阿母，阿母伊親像是我ê朋友、我ê老師，雖然外媽iā足好，m̄-koh伊會亂開錢，所以我希望伊m̄ài亂開錢。全世界ê阿母好--ê真chē，無好--ê iā真chē，m̄-koh好iā bē-sái sēng囝，無好--ê iā bē-tàng用拍--ê，我感覺我ê阿母真好。

NCKU
國際越南語認證
IVPT
KỲ THI NĂNG LỰC TIẾNG VIỆT QUỐC TẾ
INTERNATIONAL VIETNAMESE PROFICIENCY TEST

MÙA XUÂN & MÙA THU
每年春秋季舉辦

從參加
國際越南語認證開始

<https://cvs.twl.ncku.edu.tw/ivpt/> 相關詳情請參閱官網資訊

主辦單位  TRUNG TÂM NGHIÊN CỨU VIỆT NAM
國立成功大學 越南研究中心
NCKU Center for Vietnamese Studies

社團法人台越文化協會
Hiệp Hội Văn Hóa Việt Đài
Association for Taiwanese and Vietnamese Cultural Exchange



換料理台記事

O-bah

Tiû-tû chiok久chhân-chhân kā 決--lòh，總ka換新--ê，規座ê料理台，gá-suh爐，抽油煙機總換。實在講chhím-thâu-á是想beh hak 1台洗碗機niâ，尾手soah jú舞jú大，世間事tiān會án-ne，hō咱bē按算--得。

爲tiöh健康設想，盡量家己煮食，m̄-koh hia ê碗箸，油lòe-lòe ê鍋仔鼎，hō人頭足疼。雖罔假日囡仔會bāu起來洗，m̄ koh平素時iáu是我ài出手，有富貴手soah無富貴命。

上網比較各品牌洗碗機是第1步，jú看jú驚，he價數害我想beh放棄，想幾若工，決定儉腸neh肚，真無簡單決好品牌型號，soah發現原本ê料理台是規座--ê，無法度khìng洗碗機，taⁿ這聲piàng--ah，kám講beh放棄？Bē-sái，我一定beh買，心肝掠坦橫，換料理台chiah是頭路。橫直原本15年前買這間厝ê時tòh有想beh換新，是裝潢師傅講換門片tòh bē-su新--ê，已經加擋15冬--lòh，koh再講he木製桶身已經lī-lī-lak-lak，趁機會換新挂好niâ。有心beh做一定會成功，世間事kám m̄是mā án-ne--leh？

Sòa--lòh去問中古料理台kám有人願意收？無問m̄知影，一問chhoah 1 tiô，He規座白鐵仔，叫人來拆走，工錢上無ài 3,000 khō，這條錢我bē chhut--chit，利用歇熱kap伊拚，家己研究beh án-chóan拆，才koh giáh去回收場，賣夕銅舊錫，m̄ nā省3,000 koh加趁beh 1,000。雖罔頭尾用掉3工ê時間，m̄-koh規家伙仔鬥陣想變步，做伙出手拆料理台，順sòa了解規個結構，mā算是特別ê經驗。

順利解決上大座ê料理台，後1步是決定買啥款ê抽油煙機，gá-suh爐kap新ê料理台。灶跤頭擺搬kah空lo-so，講話sòa有回音，原來這ê空間koh不止仔大neh。頭擺買厝無經驗，m̄知灶跤án-chóan規劃khah好用，利用這擺好好仔拍算mā是bē bái。現代人實在離bē開網路世界，ták 項lóng去內底chhiau，看別人ê使用經驗，比價數，koh 配合家己ê使用需求，尾手chiah走去店頭看見本，轉來想幾落工，tī預算、合用kap空間利用這3項掠1 ê中和kā決--lòh。

對原本按算開40,000 khō買洗碗機，最後soah變做規ê灶跤重規劃，代誌真正m̄是像懶人想--ê án-ne，完全無

料想tiōh tāp-tāp-tih-tih ê khang-khòe竟然hiah nī chē。回想一月日無灶跤通用，ták頓買便當，買大桶ê礦泉水，beh洗碗箸tōh ài換去涼台水槽仔hia，實在真無利便。平素


時當做一切lóng是該當然，chit-má chiah知，無啥物號做必然。四序ê日子過慣勢，原來平常是hiah nī無平常。



歡迎申請 Hoan-gēng sin-chhéng

發枝台語薪傳終身貢獻賞
蔣發太先生台語師培菁英賞
孫玉枝女士台語認證傳承賞
巴克禮牧師台語文國際化貢獻賞
鄭兒玉牧師白話字貢獻賞
王育德教授台語文研究賞
鄭良偉教授台語文研究賞
王育德博士講座
林茂生大師講座
林茂生論文發表賞
陳信從老師玉蘭樹賞
詹文聲教授國際台語文獎學金
林茂生教授台語教學優良賞
發枝台灣語文出版獎助

本會全名「財團法人高雄市蔣發太孫玉枝台語文教育基金會」，簡稱「發枝台語基金會」。本會宗旨是推動釘根台語ê「台灣學」教育、促進台語文ê標準化、普遍化kap國際化以及落實聯合國「世界文化多樣性宣言」、「世界母語日」lái-té對各語言族群文化保障ê精神。



郵政劃撥 |

請註明捐款事項kap捐款者・對本會捐款會當抵稅
戶名／財團法人高雄市蔣發太孫玉枝台語文教育基金會
帳號／4236 9509



詳細請參閱發枝台語基金會全國
台語文教學、研究與創作獎勵辦法

烏克蘭kap Lō-se-a teh phah ê 戰爭是認同ê戰爭

Lâu Ui-liōng

Lō-se-a侵liók烏克蘭，現chú-sî teh phah ê戰爭，m̄是只有看ê tiōh ê飛彈、炸彈kap chhèng-chí niā-niā，siōng重要--ê tiōh是chu-sìn戰。因為科技進步，tāi-ke lóng會用手機á看消息，這tiōh代表宣傳真重要。

Chitsî，nā有人製造假消息，hō lán相信敵人有贏面，lán tiōh算bē輸，mā免戰tiōh投降--ah，敵人甚至m̄ bián用一兵一炮tiōh ē-sái占領台灣。Nā是對敵ê雙方lóng是使用kāng 款ê語言，án-ne，資訊戰tiōh koh khah好phah--ah，因為是m̄是假消息tiōh koh-khah pháiⁿ分辨。所以，lán nā有這種警覺，咱tiōh ē知影beh án-chóaⁿ來抵抗敵人ê假消息，m̄是ē-sái hō人chhìn-chhái騙kah lōng-lōng-séh--ê。

目前ê台灣是中國kâm tī chhùi--nih，iá-bē吞chiàh--落-去ê肥肉。這幾年來，中國一直teh kā全世界宣傳kóng，台灣是in ê，tī in ê「一中架構」框架中，siáⁿ人lóng bōe-sái kap中國搶台灣。中國認為，台灣m̄是台灣--ê，台灣是中國--ê。過去ê台灣，tī蔣介石ê操作下，lán聽tiōh--ê lóng是蔣介石

leh kā lán放ê假消息，kóng siáⁿ-mih lán lóng是in中國人，久來，lán台灣人ka-kī tiōh放棄beh做台灣人--ah，sīm-chì bē記leh lán ka-kī是台灣人。

台灣人70 gōa年來hō人教做是中國人，hit kóa kā lán台灣人教做是中國人ê人，in是koh khah bē認同ka-kī是台灣人，in自早以來tiōh認同ka-kī是中國人，所以in kap中國人khiā作夥，甘願死mā bō-ài做台灣人，in kan-nā beh tīh台灣人ê選票niā-niā。自來in tiōh是壓迫台灣人ê人，頭殼內kap習近平kāng-khoán，lóng是看民主kap自由kán-ná豬屎--leh。

In認為ka-kī是中國人，做中國人比民主kap自由koh khah重要，所以in nā聽tiōh台灣人beh做台灣人，in tiōh khí phùi-bīn，bē輸lán台灣人欺負in gōa thiàm--leh。過去台灣人hō in騙70 kúi年，kàu-taⁿ iah koh有真chē tī台灣ê中國人beh壓制lán台灣人做台灣人，lán台灣人nā lóng bō防備，m̄免10年，lán tiōh會hō人chiàh死死、吞了了，chhun bō 1 tè骨，koh khah免kóng siáⁿ-mih民主kap自由。

爲tiōh ài有台灣人ê認同這點，台灣政府對國家母語，tiōh應該ài用國防 ê標準來看待，m̄是kan-nā用做人情 ê心態來補助。因爲使用母語變成是lán抵抗敵人假資訊ê武器，mā是認同台灣ê重要基礎。

戰爭ê時，真簡單lán tiōh ê-sái辨識，nā ē-hiáu kóng ka-kī母語--ê tiōh是ka-kī人，nā bē-hiáu kóng母語--ê，tiōh m̄是ka-kī人，kám m̄是siōng重要ê分別？台灣人kóng台灣話，kóng原住民話，講客話，chiah有法度分辨假消息，分別敵我，án-ne mā chiah有可能建立敵我ê意識。

現在台灣一部份ê人，tī台灣大漢，拒絕學台灣ê話，mā bô beh做台灣人。Án-ne中國人nā beh放假消息，beh統戰台灣，tiōh真簡單。Che tiōh表示中國騙lán台灣人ê成本是零，in ê-sái kā台灣人放假消息，反

正台灣人也分辨bōe出是台灣政府放ê消息iāh是中國政府放ê假消息。咱台灣人已經hō中國人屠殺數萬人過--ah，70 kúi年後，kám-kóng咱tiōh koh hō現在hit-pêng ê中國人koh再屠殺1-pái？

想beh做中國人ê中國人，in根本tiōh無需要學台灣ê話，因爲in認同中國人，戰爭ê時，in kap中國tàu-khang放假消息，是tú-hó niā-niā，但是lán nā是真正beh抵抗敵人，咱tiōh ài開始建立清楚ê敵我意識，lán tiōh ài學母語。

弱國人民bô悲觀ê權利，tiōh親像現在ê烏克蘭kâng-khoán，ài學ka-kī ê母語，相戰ê時，lán chiah有châitiāu保護ka-kī ê國家，chiah bōe去hō敵人ê假消息phah倒。



台文博覽會

...
TÀI-BÙN EXPO

台文博覽會

Taiōanji 2025

台語開講會
報名分享

台語過生活

Ták個月第3ê拜6 20:00~22:00

Khai Káng

炕塗窯

Chu Chùn-hô

細漢時lóng ē kap厝邊囡á去田--nih炕塗窯，一陣人到田--nih tiòh開始分稽頭。一寡á人去khí塗窯，一寡á人去chhōe塗kak、chhōe柴、chhú-lí食ê物件，逐家bô-êng kah真歡喜。

Beh khí塗窯ê塗kak bē-sái siuⁿ sip-tâm，因爲nā siuⁿ sip-tâm ē khah bô-hó燒ta、燒紅。Mā bē-tàng siuⁿ黏。Nā-bô，燒--lòh ē變磚á kak。Ē kā食ê物件khò kah nōa-kô-kô。Mā bē-tàng siuⁿ鬆，燒--lòh塗窯siuⁿ鬆，kiaⁿ chò ê窯pang-pang khì，tiòh bô-chhái teh khí--ah。

Chò塗窯ài seng挖一空chiah用大塊塗kak做地基，塗kak做塗窯口是有mê-kak--eh，塗窯口用鋤頭挖一ê塌窟á，較停á柴chiah-bē擯tiòh塗窯口害塗窯pang--khí。真濟人lóng用磚á kak來khí。M-koh ùi 磚á kak ê塗窯口bô-hó khìng柴kap食ê物件入去。塗窯口ài對風口án-ne燒，柴火chiah ē 炎。下跤用大塊塗kak，愈面頂塗kak ài愈細塊，koh ài tâuh-tâuh-á khí倚內面chiah會當kā塗窯面頂收倚--來，ah-bô塗窯頂bô-hó收尾，khí塗窯ê時ài chim-chiok，

因爲無張持ē搊pang--khì，án-ne塗窯tiòh khí bē起來--ah。

Koh來tiòh起火燒塗kak，燒hō紅紅紅，m-koh柴火bē當燒竹á，因爲nā燒--lòh，竹á chat ē pōng-pōng--khì，真正gûi-hiám愛小心注意。Teh等塗kak燒紅ê時，tiòh去tàu-chhiau lō-kô-moâi-á包食ê物件，án-ne物件chiah bē chhàu-hóe-ta。等塗kak燒紅用番á火去ù，nà ù--薯sûi chhí--一聲khí-hóe，塗kak tiòh燒好--ah，溫度有夠koân，柴火tō會當捎出來--ah，liâu-liâu-á kā塗窯頂搆開，食ê物件ûn-ûn-á khìng--落去，像雞á、番薯kap雞卵lóng ē-sái khìng。雞á ài khìng siōng下底，koh來蕃薯，siōng頂koân是雞卵，án-ne chiah bē物件teh kah nōa-kô-kô。物件khìng好，塗窯tiòh用鋤頭敲，敲hō pang--khí，koh kā塗用hō chat，外口用塗khàm hō chat，bē-sái有chhèng煙，án-ne燒氣chiah bē散--去，物件m-chiah ē熟。Siōng bôe--á插一支草á tī thô-tui téng-koân，等草á黃黃liân--khì，tō會當開窯。Teh開窯ê時真濟人tō去掠bôe-iâh-á、chháu-meh-á kap灌tō-peh-á要kah真歡喜。

開窯mā是有mê-kak--ê，ài tùi窯邊liâu-liâu-á póe開，án-ne chiah bē傷tiōh物件，nā是siūⁿ大力物件挖斷了了，tiōh無彩工--ah，物件ó--tiōh bē當sûi提，先póe去邊--á，等燒氣較散chiah去拈較bē燙--tiōh。Tú出窯 ê 雞卵sit-chāi有夠芳，食了kui-chhùi lóng是雞卵芳。炕好ê蕃薯，kā chhàu-hóe-ta ê 皮扒掉，黃黃koh出蜜，芳芳甜甜koh有窯芳味，雞肉mā真爛，chit-ē咬--落-去，肉sûi斷bē chhâ-chhâ-ta-ta，食了真sòa-chhùi。逐家食繼了後，kā番

薯皮、卵殼kap雞骨á lóng埋tī塗底做肥料，siōng-bóe用水kā塗窯沃澹，ài細膩mài發生火災。

Kū-té炕窯是用天然物á，用了tiōh會當直接埋轉塗做肥料非常環保，hiān-chú-sî ê人 kā用--kòe ê sok-ka物á khàm塗--nih是無法度分解，造成環保問題，溫度siuⁿ koân mā有化學物á cháu入食ê物件，食落腹內造成身軀病疼，真正m̄通。

@Google Meet

Tâi-oân文學讀冊會

Ták月日第2、4 ê拜1 20:00~22:00

目前teh讀／陳明仁台語文學選

主辦／Tá-káu Tâi-gí-bûn CCHH



請thiⁿ表單

線頂台文讀冊會

Chhōe Tâi-gí 讀冊會

Ták禮拜3 20:30~22:30

目前teh讀／A-eng--a

主辦／台文雞絲麵 Tâibûn Kesimī

協辦／Tá-káu Tâi-gí-bûn CCHH



請thiⁿ表單

Làu台語—瑞士ê台語社

時間請看Làu台語-瑞士ê台語社FB

讀冊會／台灣唸歌·陳雷台語文學·陳明仁台語文學·台語文青·繪本·俗諺

主辦／Làu台語-瑞士ê台語社

會議室贊助／台文雞絲麵 Tâibûn Kesimī x

Tá-káu Tâi-gí-bûn CCHH



請傳訊息來FB

TLH 台灣字雜誌—線頂讀冊會

2024年起鼓

Làng禮拜ê拜5 19:30~21:30

主辦／台灣羅馬字協會 仁武分會

連絡電話／0911 143 668



Google表單報名

阿郎(7)

做工á人

A郎斟酌ka看，chit ê 烏狗兄面路á koh眞緣投，tòh是目頭sió-khóa-á kat-kat，憂愁憂愁ê形，留2撇嘴鬚，性格性格，烏狗兄chit 3字是叫é得過。穿1 su白色ê長phàu，凡勢是最近khah落魄，長phàu kō kah 1 chhok 1 chhok烏烏lóng無整理。A郎講：「烏狗兄，你tòa tī tó位？我送你去lín tau歇睏好--無？」A明講：「叫我A明tòh好，goán厝tī頭前直直去，請來goán tau奉茶！」2人chiū án-ne 沿路開講沿路tùi A明in厝--去。無jōa 久，行到崙頂，kan-na看tiòh幾間人家厝，tòh是無看tiòh牧場。A明手比hit keng細細間á ê 草厝，講：「Hit間tòh是goán tau，請入來坐。」行kah 厝內，kan-na看tiòh 1 tè桌á，無椅á，頂面khìng茶kó kah au-á，1 kóasù常有teh用ê家私khìng tī壁角，整齊整齊，另外1 pēng ê 厝角chhu kài chē稻草，應該tòh是睏tī稻草頂面做眠床。冊kài chē，整齊整齊幾nā thàh khìng tī壁角。

2人chē tī桌á邊，A郎問：「A明，你做siáⁿ khang-khòe？」應講：「我是讀冊人，想beh做軍師。」Sòa--lòe A明soah直直講，講bē soah，「...講tiòh治國...，...chit ê 民生福利...，...

百姓bē-sái hō iau--tiòh...，」A郎thàn A明lim茶潤喉ê時想beh插話，kan-na講出：「我teh想...。」A明soah sūi接落去講：「水利建設mā kài 要緊，水有夠用chiah有好年冬...，...hit時天下三分...，...食bē飽是án-chóaⁿ相戰...，」A郎無講soah ê話，只好吞落喉。講到相戰ê時，A郎已經teh séh神，講到「天下萬民」ê時，A郎已經手thuh tī é-hâi teh tuh 龜，tuh--leh tuh--leh tuh 1 é siuⁿ大力，手thut--去，下hâi soah去khòk tiòh桌á，A明chiah親像回魂--ā án-ne，kā A郎hōe失禮，「眞歹勢！我kiàn-nā講tiòh chia ê tāi-chì，lóng siuⁿ激動，é講kah m̄知影人。」A郎笑笑--à，應講無要緊，sòa--lòe tòh kā ka-tī是án-chóaⁿ來到chia，是án-chóaⁿ beh去南島phah歹人ê tāi-chì 詳細講hō A明聽，邀請A明做陣去。A明講：「我是teh等1 ê 好主公來邀請，beh做軍師救天下萬民無m̄ tiòh，m̄-koh he冊寫講主公tòh ài來我chit 間草厝請我3 pái，我chiah é-tàng chhut-soaⁿ，nā無我tòh眞失khùi！」「Chhut-san lah，chhut-soaⁿ意思無kāng款！」「失禮失禮，我iû-koh 講m̄-tiòh--ah！」「無，án-ne--lah，我koh請你食三粒chút米丸á，1粒

準做邀請1遍，án-ne ē通過--無？」A明sûi應講：「主公在上，受A明一拜！」「Chiâⁿ好chiâⁿ好，án-ne我tōh有伴--ā，多謝你答應。」A郎kài歡喜，án-ne koh來路--nih有人做伴，一定ke眞趣味，mā thèng好sio-chiàu-èng，a-bú有交帶che丸á kài要緊，chit-má chiah知chiah有效。

Chit暝，2 ê人chhōe tiòh伴，開講真久，一直到月娘peh kah koân-koân-koân ê時chūn，chiahs去稻草堆頂面倒--leh，睏--去。

隔轉kang，2人精神，A郎講：「咱2 ê人beh鬥陣去南島，án-ne我chia ê丸á無夠thang食，咱ài去chhoân kóa mih-kiān chah--leh，chiahs thang出發。你án-ne瘦pi-pa，mā tōh食hō飽chiahs有法度行hiah遠ê路。咱chia附近kám有siáⁿ-mih所在chhōe有食mih？」A明應講：「附近有溪á，咱來去看mái--leh，kám

好？凡勢ē-tàng liáh kóah魚！」「E，有魚thang liáh，你chǎng nah ē iau kah倒tī路邊？」「我to技術bái...。」

2人款款--leh tōh出門，路--nih tīng tiòh A明in厝邊ê伯--á，伯--á眞好禮kā A明sio借問：「Khong明，lín朋友來chhit-thô oh？」A明口氣kài正經kā伯--á應：「我叫A明，mā ē-tàng 叫我烏狗兄，mài叫我Khong明，goán chit-má beh去溪á邊liáh魚。」凡勢是A明tiān leh kah厝邊隔壁講「天下萬民」ê tai-chì，chiahs ē去hōng hō chit lō偏名。伯--á koh應：「好--lah Khong明，m̄-thang kui kang khut tī厝讀冊讀kah頭殼khong-khong，ài加減á出門行踏，lín路--nih tōh khah細jī--leh。」A郎知影Khong明chit ê偏名已經hōng叫tiāu--leh-ah，A明khah án-chóaⁿ反抗mā 無khah-choāh，lóng ke了工--ê niâ。

後回繼續



成大出版明鄉新冊， 探討鄭成功部下án-chóáⁿ釘根越南

Bûn Têng



台南場新冊發表kap座談

「有唐山公，無唐山má」這句話m-nā ùi台灣起頭，má真適用tī越南 ê 明鄉人！成大越南研究中心最近出版三本 kap 越南明鄉人 koh 有華人相關 ê 新冊。這三本冊結合越南、韓國 kap 台灣三國學者 ê siōng 新研究，超越傳統研究觀點，ùi 東亞 kap 東南亞宏觀 ê 視野，探討大明國 ê 遺臣 kap 軍民遷sóa 到越南、韓國（朝鮮） kap 台灣以後，in kap 在地人文化接觸 liáu，ǹg 在地化、釘根生滌方向發差異 ê 所在。

這三本新冊分別是《唐山過越南：越南明鄉人的認同轉變與在地化研究》（台、中雙語版蔣爲文著），《明鄉人的在地化研究：越南、韓國與台灣之比較》（台、中雙語版，越、韓、台三國學者多人合著，蔣爲文編） kap 《越南

胡志明市「福鄉人」的族語使用與活力之研究》（中文版，范玉翠薇著）。

成大台灣文學系教授兼越南研究中心主任蔣爲文表示，大約tī鄭成功家族統治台灣 ê 尾期，鄭成功 ê 舊屬高雷廉總兵「陳上川」、龍門總兵「楊彥迪」等人率兵三千gōa人投靠當時越南 ê 阮氏政權（廣南國）。阮主授予陳上川等人官職，koh令伊負責往南pêng開墾，包含現此時越南南部 ê 「嘉定」、「定祥」、「邊和」等地。因爲陳上川協助阮主ùi 柬埔寨手頭搶tiôh土地 kap 拓展南pêng ê 土地，深受tiôh後來 ê 阮朝皇帝明命、紹治、嗣德等肯定，kā 封做「上等神」。M-nā án-ne，明國遺臣 ê 後代、廣東雷州莫府城人「鄭玖」chhōa 兵á 400 gōa 人去柬埔寨南方蠻

荒 ê 所 在 開 墾 。 後 -- 來 鄭 玖 歸 順 越 南
阮 氏 政 權 ， 將 伊 開 墾 ê 土 地 送 hō 越 南
顯 宗 孝 明 皇 帝 ， hōng 封 做 「 河 仙 鎮
大 總 兵 」 , koh hō 明 命 皇 帝 追 封 做 「 樹
功 順 義 中 等 神 」 。

這 kóa m̄ 甘 愿 去 hō 滿 清 統 治 ê 明 朝
遺 民 siōng 落 尾 tī 越 南 釘 根 生 漚 ， 大 多 數 ê 人 lóng kap 當 地 ê 越 南 人
通 婚 , tāuh-tāuh-á 在 地 化 (本 土 化) ,
形 成 目 前 通 称 ê 「 明 鄉 人 」 (người
Minh Hương) 。

「 有 唐 山 公 , 無 唐 山 má 」 這 句 台 語 m̄-nā
是 源 自 台 灣 , mā 真 適 合 用 tī 越 南 ê 明
鄉 人 。 越 南 明 鄉 人 chiū 親 像 明 鄭 時
期 流 亡 到 台 灣 ê 唐 人 一 樣 , 透 過 通 婚
kap 各 式 本 土 化 過 程 , 早 chiū 建 立
in 強 烈 ê 越 南 在 地 認 同 。 基 本 上 , 明
鄉 人 lóng 使 用 越 南 語 , mā 完 全 採 用
越 南 當 地 文 化 , in 身 分 證 件 ê 民 族 類
別 mā 登 記 做 「 京 族 」 (Kinh 越 南 主 體
民 族 , 也 就 是 越 族) 。 「 龍 飛 」 kap 「
龍 集 」 年 號 做 主 張 「 反 清 復 明 」 ê 明 鄉
人 , in 家 己 創 造 ê 虛 ê 年 號 。 一 般 來

講 , 越 南 ê 廟 宇 lóng 採 用 傳 統 天 干 地
支 紀 元 或 者 是 越 南 皇 帝 ê 年 號 。 早 期
明 鄉 人 傾 向 使 用 自 創 ê 「 龍 飛 」 、 「 龍
集 」 年 號 。 M-koh 明 鄉 人 tāuh-tāuh-á
在 地 越 南 化 liáu , in ê 後 代 mā 開 始 認
同 越 南 文 化 , 接 受 使 用 越 南 皇 帝 ê 年
號 , 譬 如 講 「 明 命 」 kap 「 嗣 德 」 等 , 但
是 絶 對 bē 去 使 用 清 國 年 號 。

明 鄉 人 以 後 , 大 概 ùi 19 世 紀 尾 期 到 20
世 紀 前 半 段 , 這 段 期 間 陸 續 有 華 裔 族
群 遷 入 越 南 。 Tī 日 本 侵 略 中 國 kap 國
共 內 戰 期 間 , 真 chē 華 裔 族 群 移 民 到
越 南 避 難 。 這 kóa ùi 中 國 移 民 到 越 南
ê 華 裔 族 群 tī 越 南 ê 民 族 認 定 上 hōng
分 類 做 「 華 族 」 (dân tộc Hoa) 、 「 華 人 」
(người Hoa) 。 根 據 越 南 tī 2009 年
ê 人 口 普 查 結 果 , lóng 總 有 823,071
位 華 人 。 華 族 其 實 是 複 數 族 群 ê 綜 合
體 , 主 要 包 含 ùi 中 國 來 , 講 廣 東 話 、
福 建 話 (以 漳 州 、 泉 州 kap 廈 門 為 主) 、
潮 州 話 、 客 家 話 、 海 南 島 等 無 kāng
語 言 ê 族 群 。 這 kóa 族 群 tī 無 kāng 時
期 陸 續 搬 到 越 南 , in 越 南 化 ê 程 度 、
保 留 族 群 母 語 kap 文 化 ê 程 度 mā lóng



越南學者段黎江kap韓國學者孫惠莉線上致詞



無kāng款。In族群認同kap國家認同mā ē因為無kāng ê情境ē有變動。整體來講，kap明鄉人ê越南化相比，這kóa khah òaⁿ chiah遷sóa到越南ê華裔族群tī某種程度koh保留族語ê能力kap祖國中國ê原鄉認同。Mā因為強烈ê原鄉認同，來kap當地社會產生衝突，造成越南tī 1950到1970年代採取明顯ê排華政策。近年ê研究顯示，當代越南khah少年一代ê華人有tāuh-tāuh-á「明鄉化」ê現象。

台灣tī 1945年第2 pái世界大戰soah，mā去hō蔣介石chhōa頭，通稱「外省人」ê百萬中國軍民陸續遷徙入台。蔣介石流亡政權藉in軍事武力戒嚴統治台灣38年久，koh對台灣人實施中國化ê政策，逼台灣人「認賊做老爸」放棄台灣語文改學中國語文，致使台灣語文ê流失kap國家認同ê混亂。戰後來台灣ê中國人kap in ê後代大概會當分做二大類：第一，堅持認同中國做祖國ê中國人，譬如講郝柏村、馬英九、韓國瑜等。這kóa人因為in心向中國，無法度融入台灣，chiah

會引發台灣ê政治混亂，致使國家無安定。第二，認同台灣做新祖國ê新台灣人。這kóa新台灣人chiū親像越南ê明鄉人kāng款開始在地化、本土化，chiān做台灣在地社會ê一份子，親像鄭南榕、陳師孟、吳欣岱等。這kóa新台灣人ê歷史文化背景kap傳統台灣人無kāng，新冊ê作者參考越南ê作法ka號做「華鄉人」，意思是「以文化中華做祖先ê故鄉ê新台灣人」。

台灣這三十年來mā有chē-chē跨國婚姻移民，大約有50萬原籍ùi中國iāh是東南亞ê人民，因為kap台灣人通婚，移民來台灣tōa。其中大約11萬gōa人是ùi越南來--ê，筆者建議號做「越鄉人」(người Việt Hương)，來取代當前政府所用「新住民」chit-ê詞彙。Nā ùi泰國來--ê，號做「泰鄉人」，ùi印尼來--ê，號做「印鄉人」等。「越鄉人」是參考明鄉人而創立ê中性詞彙，有原籍越南，但是tī台灣釘根生滌ê新台灣人ê意思。Ùi越南明鄉成功案例ê來看，「釘根生滌」chiah是雙贏ê做法，iāh是移民社會應該ài有ê政策。



高雄大學越南研究中心主任陳氏蘭副教授致詞

成大kap越南大學做伙推動台語kap越南語教學

Bûn Têng



國立成功大學越南研究中心主任蔣爲文教授，最近受邀請到越南Phenikaa集團所經營 ê Phenikaa大學 ê 語言學研討會做專題演講，koh kap 河內大學簽約合作推動台越語言文化交流。

Phenikaa集團爲越南前百大企業集團，專門生產高科技產品，koh tī 2021年推出越南第一台Level 4電動自駕車。Phenikaa集團ùi 2017年開始，接手經營tī 河內 ê Phenikaa大學 liáu，這間學校 ê 排名進步非常chē。因爲這二十年來越南經濟起飛，吸引chē-chē外國廠商tī 越南投資設廠，mā 帶動越南人學習外語kap 外國人學越南語 ê

Phenikaa語言學國際研討會主辦單位kap 專題演講者合影

多語風潮。因爲án-ne，這間學校tī 2024年11月30辦理「對比語言學國際研討會」，吸引全世界各地ùi 越南、台灣、中國、日本、韓國、美國kap 法國等多國學者發表225篇論文。這場研討會安排三場專題演講，分別由台灣、日本kap 越南學者擔任講者。這pái 成大蔣爲文教授受邀請擔任專題演講，全程以越南語發表越南語、台語kap 華語三語聲調ê 比較研究成果。

蔣教授表示，台語、越南語kap 華語lóng 屬聲調語言，但是有各別無kāng ê 調類kap 調值。台灣人nā 會當掌握台

語kap越南語聲調ê精差，對學習越南語聲調來講，有真大ê幫chān。蔣教授進一步建議，台越雙方應該ài鼓勵互相學習對方ê語言。台商tī越南數量真chē，koh有影響力，應該ài ke鼓勵kap獎勵越南員工學習台語，促進台語ê國際化。M-nā án-ne，目前台灣有真chē家庭有居家照護ê需求。其中需要hōng照護ê老人多數慣勢使用台語。但是多數ê外籍照護員soah無法度使用台語，致使tiān-tiān有溝通不良ê情形發生。Nā仲介公司會當加強照護員任職進前語言ê訓練，chiū thang提升台灣居家照護ê品質。

蔣爲文表示，因爲家己讀研究所期間bat到越南學習越南語kap進行田野調查，所pái非常了解越南語言kap文化。自2003年起到成大任教liáu，陸

續tī校園開設越南相關ê課程，包含越南語、越南社會文化、越南文學、台越比較等課程，koh成立全國第1 ê越南研究中心，做台越文化交流，定期舉辦國際越南語認證(iVPT)。Chit-pái來越南，除了擔任Phenikaa大學專題演ê講者以外，蔣爲文koh代表成大越南研究中心kap國立河內大學越南學系簽約合作，共同推動雙pêng ê語言kap文化交流。

Üi-tiōh beh促進台越兩國ê語言文化交流，成大越南研究中心特別開放歷年出版關於越南語言kap文化ê電子冊hō讀者線頂免錢閱讀。有興趣ê讀者請參考下底網站。

<https://ebook.de-han.org/online>



台灣字雜誌〈Nā beh收tiōh紙本台灣字雜誌，歡迎自由樂捐。捐款請註明「捐台灣字雜誌」〉

文稿贊助 Kim-chhiú (O MÀ-MÀ) · Lí Oán-Chheng
Lahjih · Tân Lô · 楊曉君 · Bûn Têng



文稿校對贊助 Î Giòk-ngô · Tiuŋ, Hók Chû

感謝列位作者贊助文稿...

Nā有têng-tâŋ，請hām TLH聯絡！

捐款名錄 2024年11~12月

蔡裴琳	1,500	林美珍	500	劉曉玫	500	謝青樺	500
簡秀真	1,000	曾盈綸	1,000	許靜雪	1,000	陳舜怡	500
陳秀霖	1,100	許楊梅能	400	張巧慧	500	許暉東	500
吳雅雯	1,000	陳麗英	1,000	秀蘭	500	郭春輝	500
洪崇偉	1,600	謝秀珍	500	陳雅蕙	500	蔡政君	500
黃筱燕	1,000	楊振賢	500	林宗賢	500	尤千萍	500
郭乃文	500	林忠明	1,000	李菁怡	500	王彩薰	500
王耀羚	1,000	郭慈堉	500	吳政諺	500	蔡孟欣	500
劉慕怡	500	王瓊珠	1,000	黃昭華	500	余佳燕	1,000
謝亞伶	500	蔡玉嬰	500	陳凱萍	500	王琬淳	500
洪嘉穗	500	陳金月	500	余明憲	500		



台語文學系列講座

線頂1個月1場

01-06月 Lah-jih先ê「台灣人博物館」－蕭平治

07-12月 寫 Khó(Code) 也 tiōh 寫文學－杜信龍

台語創作工作坊

3大主題、計共12禮拜

07-11月 寫生活、散文、小說

09-10月 蕭平治、杜信龍

繪本 KÓNG 故事

計共3場

詳細 ê 活動內容 kap 報名請看高雄文學館、台文博覽會 TAI-BÛN EXPO 活動訊息 ►►



作家主題冊展 kap 講座

228台語詩歌文化節紹介



228台語詩歌文化節

2025
3.8

2025年3月初8來臺南市228紀念公園念歌詩、吃魷魚糜，參加台灣教師節賀卡設計比賽頒獎典禮，鬥陣siàu-liām 228消失 ê 台灣魂kap表達對台灣老師 ê 感謝。

拜六下晡 2:28~4:28 PM 228紀念公園 | 台南市政府邊仔

主辦
單位



Tâi-oân Gi-bün Chhek-giâm Tiong-sim
國立成功大學 台灣語文測驗中心
NCKU Center for Taiwanese Languages Testing



Tâi-oân Lô-má-jí Hiáp-hōe
Taiwanese Romanization Association
台灣羅馬字協會



台文筆會
Tâi-bûn Pit-hōe
Taiwanese Pen



Tâi-gí Ki-kim-hōe
蔣發太孫玉枝台語文教育基金會
Taiwanese Foundation

311
Tē 3 kài

台灣教師節紀念林茂生教授 電子賀卡設計比賽頒獎典禮



311台灣教師節紹介



Tai-oân-jī
台灣字 · 頭腦

發行
單位



Tâi-oân Lô-má-jí Hiáp-hōe
Taiwanese Romanization Association
台灣羅馬字協會
<https://tlh.org.tw>



[Https://pen.de-han.org/taioanji](https://pen.de-han.org/taioanji)



Open access網路電子版&
文章投稿請掃QR code

Nā有任何問題歡迎來 phoe:

taioanjitauko@gmail.com

Tel: 06-2096384



台文筆會
Tâi-bûn Pit-hōe
Taiwanese Pen



<https://pen.de-han.org>

獎助
單位



Tâi-gí Ki-kim-hōe
蔣發太孫玉枝台語文教育基金會
Taiwanese Foundation



<https://hoatki.de-han.org>